

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXV1 No. 2
Enero 21, 2005
www.philippinerevolution.org


Editorial

Pamunuan ang nagabilog nga nagahiliugyong prente nga anti-Arroyo!

Labi nga nag-ibwal ang kaakig sang pumulu- luyo sa sunod- sunod nga mga tikang kag polisi- ya ni Gloria Maca- pagal-Arroyo nga wala sing ano man nga kunsiderasyon sa ila interes. Bangud sa dugang nga paantos ang dala

sang mga ini, si Arroyo na mismo ang nagdabuk sa pumuluyo nga maghulag agud pukanon siya sa poder. Akig katama sa rehimeng Arroyo ang mga mamumugon kag mangunguma. Daku man ang kaakig diri sang mga yara sa nahanunga nga saray sang sosyedad pareho sang mga estudyante, titser, empleyado sang gubyrno kag propesyunal bangud sa lapnagon nga korapsyon sang rehi- meng Arroyo kag bangud indi na sila makasarang sa kabaskog sang krisis pangkatilingban.

Daku ang kahadlok ni Arroyo sa pagtukod sang malapad nga nagahiliugyong prente nga manindugan batuk sa iya rehimen. Gani wala bugto ang pagtinguha niya nga tungaon ang oposi- syon pulitikal paagi sang mga likum nga paghisugot kag pagtanyag sang mga pwesto sa burukrasya. Nabudlayan maghiliusa ang pihak-pihak nga paksyong anti-Arroyo bangud man sa suspetsa sang kada isa nga sekre- to nakipag-areglo sa Malakanyang ang mga kapareho nilang oposisionista. Lubos man nga ginatatap ni Arroyo ang mga heneral sa AFP kag PNP gani piyado siya sa lealtad sang mga ini ang makapugong sa



**Mga tampok
sa isyu nga ini...**

**Rebolusyonaryong
pagsulong sa Quezon**

PAHINA 4

**Kahimtangan sa mga
tubuhan sang Batangas**

PAHINA 6

**US Armed Forces,
nakauniporme nga
mangingilaw**

PAHINA 8

anuman nga tuyo nga pag-alsa ukon kudeta.

Wala nagahalin sa elitista nga oposisyong anti-Arroyo ang pwersa kag pagpamuno nga kinahanglanon para pukanon ang rehimen. Ang malapad nga alyansa nga magapahalin kay Arroyo magatuhaw, indi halin sa pagtinguha sang mga elitistang pulitiko, kundi halin sa pagsulong sang malapad nga hublag protesta sang pumuluyo. Ang malapad nga kubay sang mga pwersang anti-Arroyo mahiliusa paagi sa lang sa pagtinguha sang mga organisasyong masa nga pungsodnon-demokratiko nga yara sa taludtod sang kahublagang protesta anti-Arroyo. Sila ang pinakamilitante kag pinakamalig-on sa pagbatu sa garuk, kontra-pumuluyo kag papet nga rehimen Arroyo. May yara sila nga malapad nga impluwensya kag angkon nila ang ikasarang nga tingubon ang nagkalain-lain nga sektor, grupo kag partido padulong sa pagtukod sang malapad nga alyansang anti-Arroyo.

Tuman kadalum ang basehan para maghugpong ang pumuluyo sa isa ka malapad nga prenteng anti-Arroyo kag maglunsar sing makagagahum nga sulog sang protesta nga

magapahalin sa rehimen.

Sining Enero, panibag-ong serye sang mga paantos ang dala sang rehimen Arroyo sa pumuluyo nga dugang nila nga ginakaakig:

Ginmandu sang rehimen paagi sa Department of Labor and Employment ang pagpahalin sa trabaho sa 35 lider sang Central Azucarera de Tarlac Labor Union (CATLU) santu sa kagustuhan sang pamilya Cojuangco nga waskon ang unyon kag maglunsar sang balos-salakay sa mga welgista. Napamatud-an nga palso ang postura sang rehimen bilang tagapatunga sang gamiton sini ang lubos nga bug-at sang mga kontra-mamumugon nga layi agud ideklarar nga iligal ang welga. Ginbasura man sini ang mabaskog nga demanda sang mga mamumugon para sa P100 pagtaas sa inadlaw nga sweldo kag sa baylo nagmandu sang naka-insulto nga P12 dugang nga sweldo.

Labi sini nga painiton ang balatyagon sang mga mamumugon sang CAT agud padayunon ang ila welga. Makaani man sila sang mas malapad nga simpatiya kag suporta para sa ila paghimakas.

Lubos nga ginaduso sang rehimen Arroyo ang 20% nga pag-



pataas sa *value added tax* (VAT), luwas sa iban pa nga kontra-pumuluyo nga tikang sa pagbuhis bilang pagsunod sa mga dikta sang International Monetary Fund kag iban pa nga dumuluong nga ginautangan. Magaresulta lang ini sang dugang nga pagtaas sang presyo sang mga balaligyaon kag serbisyo. Samtang, padayon nga ginahatagan-prayoridad sang gubyrno ang gasto militar kag pagbayad sang palas-anon nga utang-bagay nga nagatuga sang dugang nga pagkarug sang mga serbisyo publiko.

Kadungan sini ginabalabagan ang pagpasar sang P125 dugang nga sweldo. Maathag nga ginatibong sang rehimen Arroyo ang interes sang mga dumuluong nga dalagku nga kapitalista sa kahalitan sang pumuluyong Pilipino.

Labi nga ginaipit sang rehimen Arroyo ang mga komunidad sang Moro sa Metro Manila kag iban pa nga lugar sa kagustuhan sini nga iduso ang kampanya kuno batuk sa mga terorista. Nagsabwag ini sang kakugmat kag ginlapakan ang mga sibil kag pangpulitika nga kina-



Tuig XXXVI No. 2 Enero 21, 2005

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial	1
Mga boladas ni Arroyo	3
Col. Sebastian, ginsilutan	4
Pagsulong sa Quezon	4
Pula nga pagsaulog	5
Kahimtangan sa mga tubuhan sang Batangas	6
US Armed Forces, mangingilaw	8
Pasistang kontratista	9
Pagpangita sg WMD, ginpauntat sang US	10
Kadam-an sg mga Amerikano, batuk sa gera sa Iraq	10
Madinalag-on nga TO	11
Balita	11

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas.

matarung sang pumuluyong Moro sang arestuhon sing wala mandamyento ang 17 residente sang mga komunidad sang Moro sa Maynila kag pasakaan sila sang himu-himo nga kaso kaangot sang kuno plano nga bombahan ang prusisyon sa pista sang Quiapo sining Enero 9.

Ginatuyo sang gubyernong Arroyo nga tungaon ang pumuluyong Pilipino kag Moro paagi sa hungod nga pagsugyot sang diskriminasyon sa relihiyon, kultura kag pulitika batuk sa mga Moro. Ugaling wala mapunggan ni Arroyo ang nagabaskog nga paghiliusa sang pumuluyong Pilipino kag Moro nga

pareho nakakita sang kakinahanglanon atubangon ang komun nga kaaway-ang mapiguson nga gubyernong Arroyo.

Ang sunod-sunod nga kontrapumuluyo nga mga tikang nga ini dugang lang sa nagalaba nga listahan sang mga krimen sang rehimeng Arroyo batuk sa pumuluyong Pilipino. Wala untat ang pagtinaas sang presyo sang langis kag iban pa nga pangunahong balaklon, mas malala nga burukratikong korapsyon halin sa matag-as nga upisyal militar tubtub sa pamilya Arroyo, ginabuhinan ang galastusan pangkatilingban kag ginapabay-an nga magagaruk ang mga serbisyo

pangkatilingban, ginalansang sa tuman ka nubo ang suhol kag sweldo, ginadingot ang matuod nga reporma sa duta, mas masingki ang militarismo kag wala kapares sang paglala sang mga paglapas sa tawhanon nga kinamatarung.

Luto kaayo ang kahimtangan agud hatagan direksyon ang malaparan nga kaakig sang pumuluyo. Responsibilidad sang mga pungsodnon-demokratikong pwersa nga pamunuan ang pagpakig-away sang pumuluyong Pilipino kag hugpungon ang pinakamalapad nga posibleng kubay sang mga pwersa para pukanon ang kinakangil-aran nga rehimeng Arroyo. **AB**

Mga boladas ni Arroyo

Butigon. Manugbola. Ala-Imelda Marcos, pilit nga ginapatahum ni Arroyo ang makaluluoy nga sitwasyon sang ekonomya sang Pilipinas. Sa nagligad nga mga adlaw, sunod-sunod ang iya mga deklarasyon nga wala nagakalisod ang pumuluyo. Anano pa ayhan nga mga pang-insulto ang ihaboy ni Gloria Arroyo sa labing ginagutom kag nagapanghakroy nga pumuluyong Pilipino?

"Makabakal ka bala sang *cell-card* kon indi ka nga makadalawat sang bugas?" siling ni Arroyo. Ini ang iya langis sa pumuluyo kaangot sa napabalita nga pagdaku sa kantidad sang nainom nga *beer* kag *gin* kag sang ginabakal nga *pre-paid cellular phone* sa Pilipinas sadtong 2004. Base ini sa pagdaku sang benta sang San Miquel, Smart kag Globe kag sa isa ka separado nga sarbey nga ginhimo sang AC Nielsen bahin sa padron sang konsumo sa Pilipinas. Makahuluya sa isa ka nagapabugal nga "ekonomista" nga pagguwaon ang isa ka listahan sang pinakamabenta nga mga produkto sa isa ka takda nga panahon sukatan sang matuod nga sitwasyon sang mayorya nga pumuluyo.

"Indi gid man gali malain." Ini ang ginsiling

ni Arroyo sa laragway sang lapnagon nga disempleyo sa Pilipinas matapos bag-uhon sang pareho niya nga mga "ekonomista" ang basehang depinisyon sang wala trabaho. Suno sa ila salamangka, ang mga wala nagapangita trabaho (lakip ang minilyun-milyon nga kababaihan nga nagapabilin sa balay) indi dapat bilangan nga wala trabaho. Sa isa ka pisok, nabuhinan sang 1.2 milyon ang mga wala trabaho!

Sa bulan nga ini, ginbayaran ni Arroyo ang Social Weather Station agud pagguwaon nabuhinan na ang numero sang Pilipino nga ginagutom. Nagapabilin nga misteryo na lamang sa minilyun-milyong pamilya nga nagapaiguigo sa isa ka supot sang *instant noodles* kada pagkaon kon sa diin nga hilit-hilit niya ginpu-lot ang amo nga kongklusyon.

Maisog ang apog ni Arroyo nga magkasadya nga "maluho" kag "wala man gali nagakalisod" ang pumuluyong Pilipino samtang sa idalum sang iya rehimen nagtimbuok ang presyo sang pagkaon, mga serbisyo kag mga produktong petrolyo-samtang pilit ginapaigu-igo ang mga mamumugon kag mangunguma sa mumho halin sa lamesa sang buy-unan nga mga burukrata nga mangungurakot kag mapanghimulos. **AB**



Col. Sebastian, masupog nga pasista kag *war criminal*, ginsilutan sang BHB

Ginpatuman sang Ulpiano Anareta Jr. Command sang BHB ang silut nga kamatayon sa *war criminal* nga si Ret. Col. Eduardo Sebastian, 61, sining Enero 12 sa Barangay Kanlurang Mayo, Lucena City.

Ginsilutan si Sebastian bangud sa iya mabug-at nga krimen kag mga paglapas sa tawhanon nga kinamatarung sang pumuluyo. Lakip siya sa kilala nga mga manugpatay-tawo sang diktaduryang Marcos. Bilang puno sang AFP Southern Luzon Military Intelligence Group (MIG), pangunahon siya nga responsible sa madamuan nga pagpang-aresto, pagpanortyur, pagpanalbeyds kag pagkuot sa daku nga numero sang mga aktibista sa idalum sang layi militar sadtong dekada 1970 tubtub dekada 1980.

Si Sebastian personal nga responsible sa pag-aresto, pagtortur kag bulos-bulos nga pagpanglugos kay Adora Faye de Vera sadtong 1976-1977. Ginhimong *sex slave* ni Sebaste si de Vera sa sulod sang pila ka bulan antes ini mahilway sadtong 1977. Imbolbado man si Sebastian sa pagkadula nanday Rizalina Ilagan, Cristina Catalla kag Erwin de la Torre halin Hulyo tubtub Agosto 1977. Amo, responsable si Sebastian sa

pagkadula nanday Modesto "Bong" Sison, Leticia Pascual Ladlad, Jessica Sales kag Reynaldo Cruz.

Suno kay Gregorio "Ka Roger" Rosal, tagapamaba sang Partido Komunista sang Pilipinas, ang pagsilut kay Sebastian kabahin sang nagapadayon nga pagtinguha sang rebolusyonaryong hublag nga mahatagan sang hustiya ang mga biktika sang pasistang diktaduryang Marcos.

Si Sebastian nangin upisyal sang anay Philippine Constabulary-Integrated National Police nga nakadeploy sa *intelligence unit* sang Southern Luzon Command sa idalum ni Gen. Alejandro Galido. Nangin *provincial director* siya sang pulisya sang Oriental Mindoro sadtong 1995-1996 kag sang Quezon sadtong 1996-1997 antes siya magretiro. **AB**



Rebolusyonaryo nga pagsulong sa Quezon

Indi mapunggan ang pagdamu sang pumuluyo nga nagasulong sang demokratikong rebolusyon sang banwa sa rehiyon sang Timog Katagalugan sa kabilugan kag sa prubinsya sang Quezon sa partikular. Ini ang phayag sang sekretaryo sang Partido sa Quezon sang interbyuhon ini sang **AB** sadtong Disyembre 28, 2004.

Nagdaku ang numero sang organisadong masa sang masobra 10% kag ang mga sandigan nga organisasyong masa sang masobra 8%. Mapagsik ang mga ini sa pagtuon sang nagkalain-lain nga isyu pangkatilingban. Padayon ang pagtukod sang mga asosasyong masa sa mas malapad nga erya kag ang paghanda sa pila ka malahalang nga rekisito para sa pagtukod sang mga organo sang gahum pangpulitika. Padayon nga ginasulong ang rebo-



lusyong agraryo. Napanubo ang resikada kag sa iban nga lugar nasaranggan nga kuhaon ini sing lubos. Sa amo pa man, nagapabilin nga mabinantayon ang pumuluyo sa

mga maniobra sang mga komersyante nga ibalik ang resikada sa nagkalain-lain nga pamaagi pareho sang tuman ka nubo nga pagpresyo sang ginabakal kopra. Nagmadina-

lag-on man sa iban nga lugar ang mga paghimakas agud pataason ang suhol sang mga mamumugon sa uma, presyo sang mga produktong agrikultural, pagbag-o sa partehan, pagpangapin sa kinamatarung nga magpatindog balay kag pagpamatuk sa paghakab sa duta kag pagbukas sang landfill kag iban pa.

Ginamit ang sarisaring porma sang paghimakas, ligal kag iligal pareho sang mga kampong bayan, dayalogo, rali, negosasyon kag iban pa nga mga aksyong protesta. Nag-uswag ang pag-angot kag pag-organisa sa mga nahanunga nga pwersa, propesyunal, indibidwal nga pulitiko kag iban pa nga mataas nga saray sang sosyedad.

Malig-on nga gin-atubang ang wala untat nga operasyon sang kaaway nga may tuyo waskon ang baseng masa. Naglunsar sang mga operasyong isparo, isnayping kag away sa mga pasistang tropa. Sa mga prenteng gerilya sa Northern kag Central Quezon, nakalunsar sang 18 taktikal nga opensiba. Napulo'g walo sang kaaway ang napatay kag 10 ang napilasan.

Ginapakita ang epektibidad sang basehang pormasyong platun sa pagtungod sang hilikuton kag pag-atubang sa kaaway.

Maukod nga nagarekrut kag nagapauswag sang mga bag-ong hangaway sang BHB agud mag-abaga sang nagapadamu nga responsibilidad sa pagpasulong sang armadong paghimakas. Padayon nga nagakabisar ang BHB sa pagtukod sing maayo nga relasyon pangpulitika sa tunga sang mga upisyal kag hangway, paghibalo sa kahimtangan kag pagsabat sa ila mga kinahanglanon kag paghatag sa ila sang mga pulitiko-militar nga paghanas.

Nagabakod kag nagalapad ang katapuan sang Partido sa prubinsya. Nagdaku sadtong 2004 sang masobra 8% ang katapuan sang

Pula nga pagsaulog

Disyembre 2004 sa isa ka mahawan nga lugar sa mga binukid sang Sierra Madre, nagtipon ang masobra 1,200 katapu sang Patido, hangaway sang banwa, mga katapu sang mga organisasyong masa sa kaumhan, mga mamumugon, estudyante, mangingisda, pungsodnon nga minorya kag iban pa agud saulugon ang ika-36 anibersaryo sang pagkatukod sang Patido. Sa palibot sang lugar, ang bandera sang Partido, NDFP kag BHB nagawagayway sa punta sang nakatagdok nga mahaba nga kawayan. Sa isa ka kilid, nakaukit sa duta ang maso kag garab. Gintibsukan ini sang magagmay nga bandera sang Partido nga nagasimbolo sa kada martir nga nagahalad sang ila kabuhi sa rebolusyon. Sa pihak nga kilid, nagatindog ang eskultura sang maso kag garab nga himo sa balagon kag mga dahon sang anahaw. Ginhigot ini sa tatlo ka dalagku nga sanga kag gin-isa sa kataason nga pulo ka piye.

"Lubos kabaskog nga palig-unon ang base sang rebolusyon. Lubos kaisog nga pasingkion ang armadong pagbatu sang pumuluyo. Magpursiger sa tanan nga bahin sang pagsulong." Ini ang panawagan sang Komite sang Partido sa prubinsya sang Quezon sa pagsaulog sini sang ika-36 anibersaryo sang pagkatukod sang Partido. Sa pihak sang mabaskog nga pagbubo sang ulan, nangin mataas ang diwa sang mga nagtalambong sa paghugyaw sa Partido bilang nagapamuno nga pwersa sa rebolusyong Pilipino.

Nagapalibot ang pumuluyo sa lugar nga ginatalana nga entablado samtang nagapasundayag ang mga Pulang hangaway. Gamit ang daku nga trompa, ginpalanog nila ang ila mapag-on kag militanteng mga tingog sa espesyal nga adlaw nga ini. Tampok sa kahiwatan ang mga kultural nga palaguwaon pareho sang kanta/kumpas, saot, mima, drama, binalaybay kag mural nga nagapakita sang kabuhi kag paghimakas sang rebolusyon. Nanamian sang tanan ang mga pagguwaon nga nagapakamalaut kag nagabuyagyag sa kagarukan sang estado kag nagaharing sahi.

Nagpahayag sang paghiliusa ang nagkalain-lain nga sektor sa nangin papel sang Partido sa padayon nga paglapad kag pagdalum sang suporta sa rebolusyonaryong kahublagan halin sa pinakamalapad nga masang ginapigos kag ginahimuslan. Ginsaysay ang pungsodnon nga kahimtangan nga nagapaathag sa paglubha sang krisis kag paghimulos sang nagaharing sahi subong.

Ginpasidunggan ang mga martir kag baganihan nga nagahalad sang ila kabuhi para sa banwa kag ginhugyaw ang ila sakripisyo kag amot sa rebolusyon. Ginpaambit ang mga importante nga leksyon kag kadalagan sang Partido sa prubinsya sa tuig 2004. **AB**

Partido halin sa daan sini nga isip sadtong 2003 kag nagdaku ang bag-ong tukod nga sanga sa lokalidad sang 7%. Nakalatag man ang mga sanga nga ini sa mas o menos 200 baryo, komunidad, pabrika, asyenda, eskwelahan nga nagaserbi nga bag-as kag nagapamuno sa mga pangmasang paghimakas sa kaumhan kag kasyudaran.

Padayon kag tanan nga bahin nga nagapasanyog ang mga kaupod diri sa atubang sang nagapasingki nga militarisasyon kag pagpamwersa sang kaaway. Nahibal-an nila nga kinahanglanon permi maghanda sa ano man nga mapintas kag makahas nga tikang sang kaaway kag estado nga desperado nagambisyon nga waskon ang rebo-

lusyonaryong hublag.

Hilmanon sang Partido sa rehiyon nga ginakambyo sang kaaway ang tum-ok sang mga operasyon sini halin sa Mindoro kag Laguna pakadto sa Quezon kag ang labi nga pagpasingki sa lebel sang gera. Bangud sini, nagadugang ang kinahanglanon sang lubos nga padalumon kag palaparon ang baseng masa kag pasingkion ang armadong paghi-makas. Sa partikular, dapat labi pa nga mapapagsik kag masustiner ang pagpasulong sang rebolusyong agraryo nga yabing halambalanon sa pag-pabaskog kag pagpalig-on sang baseng masa sa kaumhan. Tuyo man nga mapataas ang subong nga lebel sang mga basehang organisasyong masa kag paday-on nga matukod kag makonsolida ang mga asosasyong masa kag organo sang gahum pang-pulitika.

Labi nga mabaskog nga tulungdan ang paglunsar sang mga taktikal nga opensiba kag ang pagtinguha nga magmadinalag-on ang mga ini sa pulitika kag militar. Mabaskog ang demanda sang masa nga makahatag sang dalagku nga bunal sa kaaway. Para masabat ini, kinahanglan pamatukan ang mga bahid sang konserbatismo sa hilikuton militar. Madamu pa nga mga lugar ang kinahanglan madepleyan, mapun-an kag mapabakod ang mga yunit kag makinarya sang BHB. Madamu nga numero sang mga bag-o nga Pulang hangaway ang dapat hatagan sang pulitiko-militar nga paghanas kag pataason ang lebel sa taktika kag teknika.

Sa pagtuman sang amo nga mga tulungdan, ginapanan-aw sang Komite sang Partido sa prubinsya ang kabilugan nga pagsulong sang rebolusyonaryong hilikuton subong nga 2005. **AB**

Kahimtangan sang mga mangunguma kag mamumugon sa uma sa mga tubuhan sang Batangas



Isa sa pangunahon nga produktong agrikultural sang Batangas ang kalamay. Produkto ini sang 26 sa 32 banwa kag syudad sang prubinsya. Sadtong 2000, ang mga banwa sang Tuy, Calaca, Nasugbu, Balayan kag Lemery ang may pinakamalapad nga tubuhan.

Makit-an sa Batangas ang Central Azucarera de Don Pedro o CADP kag ang Batangas Sugar Central Inc. (BSCI), duha ka dalagku nga galingan sang tubo kag pabrika sang asukar. Ang CADP ang nagapangatlo sa Victorias Milling Corporation sa Negros Occidental kag BUSCO sang Bukidnon sa halambalanon sang kabilugan nga produksyon sang kalamay sa bilog nga pungsod. Ang gintingub nga produksyon sang CADP kag BSCI katumbas sang 53% sang bilog nga produksyon sa bug-os nga Luzon.

Pareho sang kahimtangan sa iban pa nga mayor nga mga tubuhan sa Pilipinas, ang mga tubuhan sa Batangas ginakontrol sang pila lamang ka pamilya. Base sa listahan sang reaksyunaryong gubyerno, 16 pamilya kag korporasyon ang nagapanag-iya sa masobra 26,000 ektaryang tubuhan diri. Ginatantya masobra 63,000 mamumugon sa uma ang ginaempleyo sang mga tubuhan nga ini para sa tagsa-tagsa ka operasyon. Ang mga regular nga mamumugon sa uma makit-an sa mga kadutaan nga nakapaidalum sa mga sistemang asyenda, mga nakaprenda nga duta kag kon sa diin man sila kinahanglanon. Labi nga mas makitid ang sakup sang magagmay nga manugtanum tubo. Masobra lang 10,000 ektarya ang ginatag-iyahan sang masobra 9,000 magagmay nga manugtubo (isa kag isa kag tungang ektarya

lang ang ginatag-iyahan sang kada isa). Mas lapnagon ikumparar diri ang sistemang agsa kag buwisan nga nagasakup sa masobra 18,000 ektarya. Nagaisip sang masobra 15,000 ang mga agsador. Sa mga kadutaan nga ini, hugot ginabawal ang pagtanum sang ano man nga produkto luwas sa tubo.

Indi matarung nga sistema sang partehan, mataas nga gasto sa produksyon. Samtang nagalala ang krisis nga ginabatyag sang ekonomya sang pungsod, kag sang industriya sang kalamay sa partikular, labi man nga nagalubha ang kaimulon kag pyudal kag malapyudal nga pagpanghimulos nga ginaeksperensya nila.

Ang kinaandan nga partehan 50-50 sa gasto sa pila ka bahin sang produksyon kag kita halin sa kabilugan nga nabenta nga tonelada sang tubo. Wala ginalakip sa kwenta ang balor sang pangabudlay nga ginaabaga sang mga mangunguma.

Sa sistemang 50-50, permi nga agrabyado ang agsador. Ang gasto sa pagbungkag ukon paghanda sang duta, solo nga ginapas-an sang agsador. Pati sa gasto sa pag-arado, paglinas kag pagtatap wala sang bahin ang agalon nga mayduta. Kinaandan nagatunga lang ang agalon nga mayduta kag agsador sa gasto sa abono kag pag-ani.

Ang kawad-on sang duta kag indi matarung nga partehan labi nga ginapalala sang mataas nga gasto sa produksyon pareho sang abono. Isa ka daku nga paktor sang mataas nga gasto sa produksyon sang mga manugtubo ang kawad-on sang subsidyo sang gubyerno. Halimbawa, sang kuhaon sang gubyerno ang subsidyo sini sa abono, nagdoble ang presyo sini.

Nagaabot sa masobra 58% ang kabilugan nga kita kada ektarya ang nagakadto sa gasto sa produksyon. Buhinan pa sa mabilin ang parte sang agalon nga mayduta.

Sa mga parte nga napanagtag na ang duta sa mga mamumugon sa uma kag mga agsador sa idalum sang paltik nga CARL, epektibo nga nagamit ang usura bilang kasangkapan sang dalagku nga agalon nga mayduta agud makadto sa ila ang duta.

Labi pa nga nagtaas ang gasto sa produksyon sang mangunguma sa panahon sang liberalisasyon sang agrikultura sang pungsod bangud sa padayon nga pagtaas sang bili sang mga abono kag pestisidyo.

Mataas nga interes sa pautang kag ang rekonsentrasyon sang duta. Bangud sa pigado nga kahimtangan, napilitan nga magutang ang mga agsador sa mga agalon nga mayduta, usurero, komersyante kag bangko sa pihak sang mataas nga nga interes. Napilitan sila nga iputika ukon iaryendo ang ila duta.

May duha ka klase sang aryendo. Sa una nga klase, ang tubuhan pagadumalahan sang usurero sa sulod nakasugtan nga panahon. Halimbawa, ang gin-utang nga P20,000 sang mangunguma, tatlo ka paggaling sini ang igatugyan ang iya tubuhan sa usurero kag tanan nga kita halin diri. Sa ikaduha nga klase naman sang aryendo, indi pag-ibalik sa mangunguma ang iya duta tuhtub indi mabalik sa usureroang gin-utang nga kantidad.

Lapnagon ang sistema nga ini sa mga tubuhan nga sakup sang paltik nga Comprehensive Agrarian Reform Law (CARL) sang reaksiyunaryong estado sa Nasugbu, Batangas nga kabahin sang malapad nga kadutaan sang pamilyang Roxas.

Sa mga parte nga napanagtag na ang duta sa mga mamumugon sa uma kag mga agsador sa idalum sang paltik nga CARL, epektibo nga nagamit ang usura bilang kasangkapan sang dalagku nga

agonal nga mayduta agud makadto sa ila ang duta.

Isa ka halimbawa sini ang kaso sang mga mamumugon sa uma sa Hacienda Banilad, kabahin sang mga kadutaan sang pamilyang Roxas, nga ginhatagan sang kadutaan sa idalum sang CARL. Bangud sa pagkautang, 70% sang mga napanagtag nga duta nabalik liwat sa kontrol sang pamilyang Roxas. Masobra katunga sini ang sa porma sang mga ginbayad sa CLOA sang mga agsador, kag ang iban pa nga yara sa idalum sang sistemang aryendo.

Manubo nga sweldo kag iban pa nga pagpanghimulos kag pagpang-ulipon sa mga mamumugon sa uma sa tubuhan. Tuman kanubo ang sweldo sang mga mamumugon sa uma sa mga tubuhan. Wala sang ginabaton nga ano man nga benepisyo ang mga regular nga mamumugon sa uma sa mga asyenda. Ini bisan regular nga ginabuhinan ang ila sweldo sang P98 kada adlaw para kuno sa mga benepisyo kag bonus.

Ang tagatatap sang mga duta nga nakaaryendo ginaswelduhan sang P100 kada adlaw. Ang renta sa pag-arado P250-260 kada adlaw kag sa pagtataad P0.30 kada taad (pagtanum sang tubo) ukon P300 sa isa ka libo.

Sa mga nakapaidalum sa sistemang kapatás (kilala man nga sistemang kabo), yadtong mga nagaisip sang 10 katawo pasaka kada kupon ukon hubon nga nagsukot sa agalon nga mayduta sang P130-140 kada tonelada. Ugaling ang ginapasa lang sang kapatás sa iya kupon P120-135 kada tonelada.

Gani sa kada tonelada sang kupon, nagakita ang kapatasa sang P5.00 tubtub P10.00.

Ang dalagku nga kapatasa naman nagasweldo sa mga day-o halin sa iban nga prubinsya sang P60-P100 kada tonelada, samtang ang iya sukot ukon kontrata sa may duta P140 kada tonelada. Sa sini nga kahimtangan, nagakita sang P60 tubtub P80 kada tonelada ang kapatasa.

Luwas sa sobra nga kanubuan sang ila sweldo, kinaandan nagaabot sang duha ka simana antes ini mabaton sang mga day-o nga mamumugon sa uma. May mga kahimtangan nga nagaabot sang pila ka bulan antes magkwentahan kag mabal-an ang kantidad nga kitaon sang day-o.

Sa sini nga kahimtangan, ang mga day-o nagabale sa puno sang kupon ukon sa kapatasa agud masabat ang kinahanglanon kada adlaw. Kon sila lokal ukon day-o nga yara sa pagpamuno sang kapatasa, masami ginadaya pa sila sa kwentahan. Nagaguwa pa kon kis-a nga may utang ukon sobra ang ila nabale.

Mas malala pa ang naeksperensyahan nga pagpangulipon sang kababaihan kag bata nga mamumugon sa uma. Ang kababaihan ang masami nagatungod sang pananaad kon sa diin ginbayaran sila sang P120 kada 1,000 taad. Sa paggama kag pagtapas sang tubo, P120-150 ang masami nga sweldo sa ila kag P100 naman kon may pagkaon. Ang bata sa kinaandan yara sa Grade 5 tubtub Grade 6 ukon edad 10 tubtub 12 ginabayaran sang pakwayan sang P200 kada parsela nga ila malimpyo. Kinaandan, ang bayad sa paglimpyo P120 lang kada adlaw, nga pagatulungaon pa sang ga bata. **AB**

US Armed Forces, nagakauniporme nga mangingilaw

Daw hayop ang pagtrato sang mga tropa sang US Armed Forces sa mga bilanggo sang Abu Ghraib Prison sa Iraq. Sa base militar sini sa Guantanamo, Cuba, gintukod sang US ang Camp Xray, internasyunal nga bilangguan para sa ginaakusahan sini nga mga "terorista." Masobra na duha ka tuig nga nakahunong didto ang masobra 600 priso halin sa 40 pungsod bisan wala sang maathag nga kaso nga ginpasaka sa ila.

Kabahin sang tulungdan sang mga suldado nga Amerikano nga nakadestino sa mga bilangguan nga ini ang pagtortur sa mga bilanggo agud makapuga sang importante nga impormasyon. Ginhatagan sila kahilwayan sang matag-as nga upisyal nga "himuon ang ano man nga nagakadapat" samtang nagabulag-bulagan sa mga kahayupan nga ginabuhat sa mga bilanggo. Ang mga bilanggo paliwat-liwat nga ginasumbag, ginasipa, ginasampal, pwersahan nga ginaineksyunan sang droga, ginadingutan sang tulog, ginapatumtuman sang pusil kag ginatakluban sa ulo. Kabahin sang tortur ang mabaskog nga pagpatunog, madugayan nga ginpakatin-katin sa mga bilanggo kag pagkandado sa ila sang hublas sa mga selda.

Malaut pa, wala tagu-tago nga ginbuyagyag sang mga suldado ang ila kahayupan. Mismo ang mga suldado nga ini ang nagbutang sang mga laragway sa *internet* agud magpahambog sa ila mga kaabyanan kag kaparyentehan.

Yara ang mga laragway sang isa ka bag-ong dakup nga Iraqi nga



ginatindakan sang isa ka suldado nga Amerikano kag ginapaihian pa sa iban. Gintakluban sa ulo, ginapauba kag ginsampaw-sampaw nga daw *pyramid* ang isa pa nga grupo sang mga bilanggo nga Iraqi. May mga laragway man nga nagapakita nga ginapungkuan sang pila ka tropa sang US Navy SEALs ang mga hublas kag ginapamaskara nga bilanggong Iraqi, ginkulata sang pusil ang duguan nga ulo kag nagatapak ang nakabotas sa dughan sang mga ini. Nabuyagyag sa mga bidyo ang sekswal nga pagpang-abuso sa bilog nga mga grupo kag pagmandu sa isa ka babayeng bilanggo nga ipakita ang iya dughan.

Makangingil-ad ang iban pa nga detalye nga nagguwa sa ginsumpaan nga mga pagsaysay sang iban pa nga suldado. Masami, ginasuksukan sang nakasindi nga sigarilyo ang dalunggan sang mga bilanggo. Ginahigot sila sa poste, ginaluthang sang mga bala nga goma kag ginabulad sa adlaw tub-

tub malipong. Suno sa mga report nga nakalap sang American Civil Liberties Union, ginakadenahan ang mga batiis kag kamot kag ginabuktot ang mga bilanggo sang halin 18 tubtub 24 oras. May mga kahimtangan nga ginabungol sila sang tuman kabaskog nga tunog kag ginasilaw sang maputi nga suga. Nasaksihan sang isa ka ahente sang Federal Bureau of Investigation ang pagkuga, paglatigo kag paghunong sang mga bilanggo sa matugnaw nga selda. Ginkuryente naman ang isa ka US Marine ang isa ka bilanggo gamit ang kurdon sang *electric transformer*.

Direktahan nga ginatampalas ang pagtuluohan nga Islam para labi nga pakahuy-an kag paantuson ang mga bilanggo. Suno sa mga testimonya, samtang nagakinadlaw kag nagapanihol, ginpwera sang mga suldado ang isa ka bilanggong Muslim na magkaon sang karneng baboy, mag-inom sang alak kag magpasalamat kay Hesukristo nga siya buhi pa. Ginahaboy ang Koran (balaan nga libro sang mga Muslim) sang mga bilanggo sa inodoro kag ginapilit sila nga talikdan ang ila pagtuluohan. Ginpamunuan pa sang isa ka heneral ang pagpaahit sang mga barbas (nga ginabawal sa isa ka sekta sang mga Muslim). Ang bandera sang Israel, simbolo sang mga Hudyo, ginaputos sa lawas sang mga bilanggo.

Ginkumpirma man sang International Committee of the Red Cross nga hungod nagagamit ang US Military sang sikolohikal kag pisikal nga tortyur sa mga bilanggo sini sa nagkalain-lain nga lugar. Sa kabaskog sang tortyur, masami nga napwera ang mga bilanggo nga akuon ang mga ginaakusar sa ila (nga masami bahin sa pagkaimbolbar nila kuno sa al Qaeda) bisan sila inosente. Madamu sa mga gin-abuso nga bilanggo namatay.

Sa tuyo nga ihimutig nga sistematiko ang pagmaltrato sa mga

Pasista nga kontratista

Luwas sa US Armed Forces, lapnagon nga ginagamit sang imperyalismong US sa mga "kontra-terorista" nga operasyon sini ang may 20,000 *military contractor* sa Iraq. Masami, ang mga ini mga anay heneral kag suldado nga ginahinakayan sang gubyerno sang US kag ginaswelduhan sang tubtub \$200,000 agud himuon ang mga pamaagi nga kon usisaon ginadumili sa balayon sang militar pareho sang tortyur kag pagpatay sa mga bihag.

Si Jonathan Keith Idema, halimbawa, isa ka anay myembro sang Special Forces. Ang ila mga ginabuhay, siling niya, koordinado sa CIA kag suportado sang matag-as nga upisyal sang US. Sadtong Hulyo 5, 2004, ginsulod sang mga pulis nga Afghani ang isa ka pribado nga bilangguan nga ginadumalahan niya. Didto, nakit-an ang tatlo ka lalaki nga nakabitay halin sa kisame samtang lima pa ang ginbakol kag nakagapos sa sulod sang madulom kag gamay nga kwarto.

Anay suldado man sang Special Forces si David A. Passaro. Ginmanduan siya sang gubyernong US nga kuhaan sang impormasyon si Abdul Wali, ginaakusahan nga terorista sa Afghanistan. Sang gin-insister ni Wali nga wala siya sing nahibal-an, ginbakol siya ni Passaro gamit ang mabug-at nga *metal flashlight* tubtub siya mamatay.

Sining mga nagtaliwan nga tuig, naimbolbar ang mga kontraktor sa sarisari nga kaso sang pagpang-abuso-halin sa mga rasista nga pagpang-abuso pareho sang sa Croatia tubtub sa *sex trafficking* sa Bosnia. Bisan nagaatubang subong sa mga kaso kriminal sanday Idema kag Passaro, wala sang makapugong sa imperyalistang gubyerno nga maghinakay sang mga linibo pa nga kabaylo nila. **AB**

sibilyan kag bilanggo, naghugas-kamot ang gubyernong Bush kag ginatudlo sa magagmay nga grupo sang mga suldado ang mga krimen. Napanas na sa mga report ang ngalan sang mga heneral kag iban pa nga upisyal nga dalahig sa mga kaso. Ang camp commander sang Camp Xray, si Maj. Gen. Geoffrey Miller, wala mapinahan kag sa baylo mahipos lang nga ginsaylo sang hilikuton.

Antes pa man mabuyagyag ang mga kaso sang pagpang-abuso, likum nga gintukod ni Bush ang isa ka ilegal nga hubon sang mga espesyal nga operatiba. Katungdanan sini nga dakpon ukon patyon ang mga matumod nga myembro sang al Qaeda diin man nga bahin sang kalibutan. Wala ini nagasunod sa mga internasyunal nga layi. Kabahin sa "special-access pro-

gramme" nga ini ang pagtukod sang mga likum nga sentro sang interogasyon kon sa diin ginatugutan ang mapintas nga pagtrato sa mga bilanggo.

Isa sa pinakaulihi nga paagi agud pwersahan nga paludhon ang pumuluyong Iraqi ang paglusob kag pagwasak sang mga tropang US sa Falluja, balwarte sang mga hang-away Iraqi. Sa ginatawag ikaduha nga "*shock and awe attack*" (makakilobot kag makakulugmat nga pagpanalakay), ginatantya nga may 6,000 patay, linibu-libo ang pilason kag masobra 250,000 pumuluyo ang pwersahan nga ginapaebakwet sa madugon nga pagsalakay sang mga imperyalistang tropa diri. Pwersahan nga ginhalughog sang US Armed Forces ang mga balay kag basta na lang ginadakup ang kalalakihan. Ginguba ang mga tin-

dahan, ospital, moske, karsada kag mga imprastruktura sang importasyon kag komunikasyon. Gintarget ang mga pangunahon nga ginakuhaan sang tubig kag kuryente. Gintuyo nga may *media black out* agud taguon sa kalibutan ang mahigko nga operasyon sa Falluja.

Gingamit ang halos bug-os nga arsenal sang US lakip ang mga F-16, C-130, mga Abrams *tank* kag Apache *helicopter*. Ginluthang ang mga ambulansya, kag pati mga bata ginatarget sang mga Amerikanong isnayper. Gin-ako

man sang Pentagon ang paggamit sang napalm (isa ka kemikal nga panunog) batuk sa bilog nga mga komunidad.

"Kalmado kag bug-os ang buot sang mga suldado samtang ginapas nila ang kabuhi sang pumuluyo," siling sang isa ka saksi nga peryodista. Sa isa ka insidente, wala nagapamisok ang mga suldado samtang ginapalukpan ang isa ka biktima nga pilason na kag nagakuriit sa duta.

Pila ka pulo ka libo na ang napapas sang imperyalismong US

sa daluk kag desperado nga gera sini. Madamu sa mga suldado sang US ang nademoralisa, nadulaan maayo nga pagpaminsar ukon nagpangita sang paagi agud makapalgyo sa brutal nga imperyalistang misyon nga magpasilabot, manggamu kag magpatay. Nagadamu ang nagadesisyon nga bayaan ang pagka-suldado. Samtang, ang imperyalistang armadong pwersa nagaatubang sa makatarung, nagalapad kag nagasingkal nga kaakig kag paghimakas sang pumuluyong Iraqi. **AB**


Pagpangita sang WMD sa Iraq, ginpauntat na sang US

GINPAUNTAT na sang US ang halos duha ka tuig nga napaslawan nga pagpangita sang *weapons of mass destruction* (WMD) sa Iraq. Nagbalik na sa US ang mga myembro sang Iraq Survey Group (ISG), lakip si Charles A. Duelfer, puno sang grupo. Ang Iraq Survey Group nga ginatapuan sang 1,700 tawo, ang ginpadala sang US sadtong Mayo 2003 agud mag-usoy sang WMD sa Iraq.

Ang pagpondo sa pagpangita sang mga WMD pamatuod nga binutig ang balidad sang US sa pagpanggera kag pagpanakop sini sa Iraq. Ginapamatud-an sini nga ang kuno datos paniktik sang US nga nagahimo kag nagtipon sang *nuclear, chemical* kag *biological weapons* si Saddam Hussein bangdanan lamang para agawon ang manggad nga langis sang Iraq.

Sa pihak sang kapaslawan sini nga makakita sa ano man nga WMD sa Iraq, nagapakatig-a gihapon si Bush nga husto ang pagpanakop sang US sa pungsod.

Oktubre sang nagligad nga tuig sang magpaguwa sang report si Duelfer nga nagasiling wala WMD ang Iraq sang ginlunsar sang US ang pagpangbomba sa pungsod sadtong Marso 2003. Sadto naman nga Enero 2004, nagbiya ang una nga puno sang ISG nga si David Kay kadungan sang pagdeklarar nga wala sang WMD sa Iraq.



Kadam-an sa mga Amerikano, batuk sa gerang agresyon sa Iraq

BATUK ang kadam-an nga Amerikano subong sa ginalunsar nga gerang agresyon sang US batuk sa Iraq. Ini ang opinyon nga nakasaad sa duha ka separado nga sarbey nga ginpublisar sining Enero 18. Kabaliskaran ini sa pagpati ni Pres. George W. Bush nga ang liwat nga pagpili sa iya bilang pangulo sang US pagpakita sang suporta sang mga Amerikano sa gera sa Iraq.

Ginapakita sa sarbey sang Washington Post/ABC News nga 55% sang mga Amerikano ang nagapati nga sayup ang paglunsar sang gera batuk sa Iraq samtang 44% ang nagaaprubar sini. Singkuenta'y singko porsyento (55%) sang mga Amerikano ang wala nagapati nga mangin istable na ang gubyerno sa Iraq pagkatapos sang eleksyon. Halos amo man sini ang sarbey sang USA Today/CNN/Gallup kon sa diin 52% sang mga Amerikano ang indi pabor sa pagpadala sang mga mapanakop nga tropa sa Iraq.

Samtang, gin-ulan sang mga pagpaka-malaut ang maluho nga inagurasyon ni Bush sining Enero 20. Maabot sa \$60 milyon ang gasto para sa siyam ka selebrasyon. Baynte milyon ka dolyar (\$20 milyon) diri para paturon ang seguridad sa White House. Maabot sa 6,000 ka unipormado kag di-unipormadong pulis kag 2, 500 suldado ang gindeploy sa Washington D.C. bangud sa daku nga numero sang mga demonstrador nga batuk kay Bush.



Pila ka tampok nga taktikal nga opensiba sa Mindanao

Sa atubang sang nagagrabe nga krisis sa pungsod, Spadayon nga nagabaskog ang armadong rebolusyon sa Mindanao.

Nagaabot sa 60 ang mga ginlunsar nga taktikal nga opensiba sa nagligad nga tuig. Halin sa mga ini, masobra 150 baril ang naagaw sang BHB. Sa rehiyon sang Southern Mindanao, maabot sa 57 ang patay sa mga tropa sang kaaway kag 54 ang pilason. Sa rehiyon Northeastern Mindanao, 41 ang patay sa kaaway kag isa ang pilason.

Sa pihak nga bahin, nabuhinan sang pila ka kadre kag kaupod ang BHB bunga sang mabangis nga atake sang kaaway. Lakip diri ang duha ka rehiyunal nga kumander kag pila ka kumpanya kag platun nga lebel nga mga upisyal militar kag giyang pangpulitika. Ginapasidunggan sang bilog nga rebolusyonaryong hublag ang ila paghalad sang kabuhi.

Pila sa mga tampok nga kadalag-an sa armadong paghimakas ang masunod:

Enero. Reyd sa Highway Patrol sa Antongalon, Butuan City.

Pebrero. Pag-agaw sa inisyatiba sa atake sang kaaway sa Tambacan, South Cotabato.

Marso. Engkwentro sa 27th IB sa Danlag, Tampacan, South Cotabato. Reyd sa Marsmann Detachment, Maco, Compostela Valley. Ambus sa Mahanog, Gigaquit, Surigao del Norte. Ambus sa 25th IB sa Kidlawan, Magsaysay, Davao del Sur.

Abril. Reyd sa detatsment sa Nabunturan, Compostela Valley. Pagdis-arma sa Anislagan, Tagbina, Surigao del Sur; Tambulig, Zamboanga del Sur; Loreto, Agusan del Sur. Ambus sang *convoy* ng 25th IB sa Malapatan, Sarangani Province.

Mayo. Ambus sa Leon Postigo, Zamboanga del Norte. Ambus sa Concepcion, Misamis Occidental.

Hunyo. Reyd sa istasyon ng PNP sa Bayugan, Agusan del Sur. Reyd sa munisipyo ng New Corella, Davao del Norte.

Hulyo. Pagdis-arma sa Philippine Navy sa Bulawanon, Rosario, Agusan del Sur.

Agosto. Ambus sa Guinabsan, Buenavista, Agusan del Norte.

Septyembre. Pagsalbar kay Ka Jovan, isang bilanggong pulitikal, sa Nabunturan, Compostela Valley.

Disyembre. Ambus sa Salaysayan, Nasipit, Agusan del Norte.

(Halin sa report sang NDF-Mindanao Information Bureau)

Wala untat nga pagpamatay sa Davao City, ginkundenar sang BAYAN

Mabaskog nga ginkundenar sang Bagong Alyansang Makabayan (BAYAN)-Southern Mindanao ang wala untat nga pagpamatay sa Davao City. Nagalab-ot na sa 22 katawo ang biktima sang pagpanalbyeds sa syudad sa sulod sang 15 adlaw.

Pinakaulihi nga mga biktika sang mga nakabisikleta nga vigilante amo sanday Albert Canedo kag Jun Rey Reducto, pareho mga katapu sang Anakbayan. Ang duha ka pamatan-on wala sang kriminal nga rekord sa ila komunidad.

May pagtan-aw ang BAYAN nga ang nagapadayon nga pagpanalbeyds nga ini pagkundisyon sa paminsaron sang pumuluyo nga batunon ang ekstrahudisyal nga pagpatay sa mga nagaduso sang droga kag magagmay nga kriminal. Nagpabutyag sang kabalaka ang BAYAN nga sa pagkapatay kanday Canedo kag Reducto, pagpanalbeyds ang mangin pamaagi agud likidahon ang mga lider kag katapu sang mga progresibong organisasyon.


Ginpakamalaut man sang BAYAN ang pagka-inutil sang Philippine National Police, Task Force Davao (TFD) kag Armed Forces of the Philippines bangud tubtub subong wala pa ini sang nadakup sa mga kriminal.

Inagurasyon ni Abbas, ginhiwat

Nanumpa si Mahmoud "Abu Mazen" Abbas bilang presidente sang Palestinian Authority sin-ing Enero 15 sa West Bank. Ang pagpasumpa gintigayon gilayon pagkatapos magdaug si Abbas sa eleksyon nga ginhiwat sining Enero 9 agud bayluhan ang nagtaliwan nga si Yasser Arafat.

Si Abbas, nga nagbulos man kay Arafat bilang tagapamuno sang Palestinian Liberation Organization, nag-angkon sang 62% sang mga boto.

Isa ka adlaw antes ang inagurasyon ni Abbas, gin-utod ni Ariel Sharon, prime minister sang Israel, ang angot kay Abbas kag sa Palestinian Authority bangud kuno sa mga pagpang-atake sang mga grupong Palestinian. Ini sa pihak sang panawagan ni Abbas para sa pagpadayon sang sugilanon sa tunga sang mga magkaaway nga pungsod agud resolbahon ang kinagamu.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVI No. 2
Enero 21, 2005
www.philippinerevolution.org


Editorial

Pamunuan ang nagabilog nga nagahiliugyong prente nga anti-Arroyo!

Labi nga nag-ibwal ang kaakig sang pumulu- luyo sa sunod- sunod nga mga tikang kag polisi- ya ni Gloria Maca- pagal-Arroyo nga wala sing ano man nga kunsiderasyon sa ila interes. Bangud sa dugang nga paantos ang dala

sang mga ini, si Arroyo na mismo ang nagdabuk sa pumuluyo nga maghulag agud pukanon siya sa poder. Akig katama sa rehimeng Arroyo ang mga mamumugon kag mangunguma. Daku man ang kaakig diri sang mga yara sa nahanunga nga saray sang sosyedad pareho sang mga estudyante, titser, empleyado sang gubyrno kag propesyunal bangud sa lapnagon nga korapsyon sang rehi- meng Arroyo kag bangud indi na sila makasarang sa kabaskog sang krisis pangkatilingban.

Daku ang kahadlok ni Arroyo sa pagtukod sang malapad nga nagahiliugyong prente nga manindugan batuk sa iya rehimen. Gani wala bugto ang pagtinguha niya nga tungaon ang oposi- syon pulitikal paagi sang mga likum nga paghisugot kag pagtanyag sang mga pwesto sa burukrasya. Nabudlayan maghiliusa ang pihak-pihak nga paksyong anti-Arroyo bangud man sa suspetsa sang kada isa nga sekre- to nakipag-areglo sa Malakanyang ang mga kapareho nilang oposisyonista. Lubos man nga ginatatap ni Arroyo ang mga heneral sa AFP kag PNP gani piyado siya sa lealtad sang mga ini ang makapugong sa



**Mga tampok
sa isyu nga ini...**

**Rebolusyonaryong
pagsulong sa Quezon**

PAHINA 4

**Kahimtangan sa mga
tubuhan sang Batangas**

PAHINA 6

**US Armed Forces,
nakauniporme nga
mangingilaw**

PAHINA 8

Mga instruksyon sa pag-imprenta

1. Ang pahina 13, nga eksakto nga kopya sang pahina 1 maluwas sa mas malus-aw ang *masthead* ukon *logo* amo ang para sa mga nagagamit sang *mimeo machine* ukon naga-imprenta paagi sa *v-type*. Gindisenyo ini para indi madali masamad sang istensil.
2. Pag-imprenta sa istensil:
 - a) Sa *print dialog*, i-check ang **Print as image**
 - b) Kuhaon ang *check* sa **Shrink oversized pages to paper size**
 - k) I-click ang **Properties**
 - d) I-click ang **Advanced**
 - e) Siguruhon naka-set sa 100% ang **Scaling**
 - g) Padayunon ang *pag-print*
3. Ginabuyok ang mga kaupod nga ipaabot sa patnugutan sang AB ang anuman nga problema kaangot sa pag-imprenta paagi sang *v-type*. Magpadala sang *e-mail* sa *ang-bayan@yahoo.com*